

## Headlines

1. केन्द्री मंत्री नितिन गडकरी ते मुखमन्त्री उमर अब्दुल्ला होरें जम्मू-श्रीनगर राश्ट्री जरनैली सिङ्क गी परतियै ब्हाल करने सरबन्धी कम्में दा जायजा लैता। मुखमन्त्री होरें फलें कन्नै लदोए दे ट्रक्कें गी निर्विघ्न ढंग्गै नै अगगे बधाने दी जरूरतै पर जोर पाया।
2. मुखमन्त्री होरें जम्मू-कश्मीर च नमीं उभरा करदी सैलानी थाहरें दे विकास बारै इक समीक्षा बैठक लाई। इस मौके पर उनें जे.एंड.के टूरिज्म ऐप्प बी जारी कीती।
3. प्रधानमन्त्री नरेन्द्र मोदी हुंदे जरम ध्याडे पर पूरे देसै च अज्जै थमां सेवा पखवाड़ा मनाया जारदा ऐ जेह्दा ओंदी 2 अक्तूबर तगर जारी रौह्ग।
4. मुख सचिव अटल डुल्लु होरें महत्वपूर्ण योजनाएं दा जायजा लैता ते कम्में गी बेल्ले सिर बूरा करने ते योजनाएं दी अमल-आवरी च तेजी दे निर्देश दित्ते।
5. श्री माता वैश्वो देवी जी दी जात्तरा 22एं दिनें तगर बंद रौह्ने मगरा अज्जै थमां फ्ही शुरु होई गई ऐ जेह्दे पर श्रद्धालुएं बड़ी खुशी जताई ऐ।



## CM Gadkari Highway

मुखमन्त्री उमर अब्दुल्ला होरें जम्मू-श्रीनगर राश्ट्री जरनैली सिङ्कै गी गड्डिएं दी आओ-जाई लेई परतियै ब्हाल करने दे कम्मै दा जायजा लैने लेई केन्द्री मंत्री नितिन गडकरी हुंदे आसेआ सद्दी गेदी बैठका च कल वर्चुअल ढंग्गै नै शिरकत कीती। इस मौके पर उमर होरें मते चिरै थमां जरनैली सिङ्कै बंद होने करी फल उत्पादकें गी पेश आवा करदी मुश्कलें पर लोऽ पाई ते केन्द्री मंत्री होरें गी गुजारिश कीती जे ओहू बड्डी मोटर गड्डिएं दी निर्विघ्न ढंग्गै नै आओजाई जकीनी बनान। श्री गडकरी होरें उ'नेंगी जकीन दोआया जे उंदिएं सबनें चैंताएं दा तौले नबेड़ा करोआई दित्ता जाह्ग। तोआई जम्मू-कश्मीर दे राई-बाई मंत्री जावेद डार होरें कल जम्मू-श्रीनगर राश्ट्री जरनैली सिङ्कै दा निरीक्षण कीता ते मुखमन्त्री होरें गी उत्थे जमीनी सतह पर बने दे हालात बारै जानकारी दित्ती। एहू जायजा बैठक, मुखमन्त्री हुंदे आसेआ टेलीफोन पर कीती गेदी गुजारिश दे मगरा लाई गई जेह्दे च उनें इस महत्वपूर्ण सिङ्क राबते गी परतियै खोले जाने दी फौरी जरूरतै पर जोर पाया हा।



## CM Tourist Destinations

मुखमन्त्री उमर अब्दुल्ला होरें जम्मू-कश्मीर च नमीं उभरा करदी सैलानी थाहरें दे विकास दी समीक्षा लेई इक उच्चै सतह दी बैठक दी प्रधानता कीती। उनें समर्पित मास्टर-प्लैन ते कचरे दे प्रबंधन आह्ली तगड़ी प्रणालिएं कन्नै टकोहदी थाहरें स्थावै सैलसफा दे विकास दी जरूरतै पर जोर पाया तांजे टिकाउ सैलसफा बवस्था जकीनी बनाई जाई सकै। मुखमन्त्री होरें परियोजना प्रबंधन इकाई खडेरने ते उत्थे लोडचदी गिनतरी च अमले गी तैनात करने दी जरूरतै पर बी जोर पाया ते बक्ख-बक्ख मैहकमें ते सरकारें बश्कार बक्ख-बक्ख स्तरें पर तालमेल दी जरूरतै पर बी लोऽ पाई। उमर होरें इस मौके पर इक नमीं टूरिज्म ऐप्प बी जारी कीती जेह्दे राहें सैलानिएं गी बक्ख-बक्ख थाहें ते जात्तरा मतल्लक लोडचदी जानकारीयां सखल्ले हासल होई सकडन।



## PM B Day

प्रधानमंत्री नरेन्द्र मोदी हुंदा जन्म ध्याडा मनाने दे तौर पर अज्ज मुख भरै च “सेवा पखवाड़ा” शुरु होगा। एह पखवाड़ा 2 अक्तूबर गी महात्मा गांधी ते लाल बहादुर शास्त्री हुंदी जयंति तोड़ी जारी रौहग। प्रधानमंत्री नरेन्द्र मोदी होरें गुजरात दा मुखमंत्री रौहंदे होई ते हून प्रधानमंत्री दे तौर पर, अपने नेतृत्व दी यात्रा च जनसेवा ते सामाजिक सुधार दे महत्व पर जोर दिता ऐ। प्रधानमंत्री हुंदे जन्मध्याडे कोला लेइयै गांधी जयंति तोड़ी केन्द्र ते राज्य सरकारें दे तालमेल कन्नै भलाई-बेहतरी ते जागरूकता सरबन्धी गतिविधियों दी श्रृंखला चलाई जाग। जम्मू-कश्मीर दे उपराज्यपाल मनोज सिन्हा होरें प्रधानमंत्री होरें गी जन्मदिन पर ममारखां दितियां न।

<><><><><><>

## Seva Saptah Eminent Personality (Byte)

प्रधानमंत्री नरेन्द्र मोदी होर अज्ज दुनिया दी सम्भने शा प्रभावशाली शख्सियतें चा इक्क बनी गेदे न ते उं'दी एह जात्तरा बड़ी असाधारण रेई ऐ। भारत दे प्रधानमंत्री दे तौर पर अपने खरे कम्में दी बदौलत उं'नें हर बक्खी दा सराहना हासल कीती ऐ। अज्ज श्री मोदी हुं'दे जरम ध्याडे दे मौके उपपर केई मन्त्री-परमन्त्री दिएं हस्तिएं उं'दे लेई संदेस भेजे न। मन्त्री-परमन्त्री दिएं गायिका आशा भोसले ते अनूप जलोटा हुं'दा इस बारै केहू आखना ऐ। आओ सुनने आं.....

(बाईट)

<><><><><><>

## JK Sewa Parv

जम्मू-कश्मीर च सबनें जिला प्रशासनें अज्जै थमां शुरु होआ करदे सेवा पर्व 2025 लेई सबनें तैयारिएं गी मुक्कदा रूप देई दित्ता ऐ। सरबन्धत डिप्टी कमिशनरें अधिकारिएं गी निर्देश दित्ते न जे ओहू सबनें सब-डिवीजनें च योजनाबद्ध ढंगै'नै गतिविधिएं दी बवस्थित अमल-आवरी जकीनी बनान। इस दरान जेहडे मुख खेत्तरें पर ध्यान केन्द्रित कीता जाहग उं'दे च स्वच्छता अभियान, नशा मुक्त अभियान, डिजिटल साक्षरता, आपदा प्रबंधन जागरूकता ते मिशन युवा तैहत नौजवानें दी भागीदारी ज्नेही गतिविधियां शामिल न। मैहकमें गी आखेआ गेआ ऐ जे ओहू रोजमर्रा दिएं गतिविधिएं गी बवस्थित ढंगै'नै तोढ चाढन ते इ'नें गतिविधिएं गी मता सार्थक ते असरदार बनाने लेई लोकें दी शमूलियत बी जकीनी बनान।

<><><><><><>

## Prog. Announcement

सेवा पर्व 2025 दे तैहत आयोजित बक्ख.बक्ख कार्यक्रमें ते गतिविधियों दे इक हिस्से दे तौरा पर आकाशवाणी दा क्षेत्रीय समाचार एकांश जम्मूए अज्ज 17 सितम्बर गी दपैहरी 2रू30 बजे 30एं मिनटें दी इक बशेश परिचर्चा प्रसारत करने जाश्रदा ऐ. जेहदा विशे सार ऐ. श्आर्थिक सुधारें कन्नै विकास गी थ्होआश्रदी नमीं गतिश्। इस कार्यक्रम च साढे परौहने होडन. जम्मू युनिवर्सिटी च Economics Dept. दे Prof. Dipanker Sengupta जेडे इस विशे दे बक्ख.बक्ख पैहलुएं पर लोऽ पाडन। उन्दे कन्नै गल्ल करडन साढे न्यूज एंकर . जगमोशन शर्मा ते कुणाल श्रीवत्स। 30एं मिन्टे दा एहू कार्यक्रम अज्ज दपैहरी 2रू30 बजे प्रसारत कीता जाहगए जिसी तुस साढी थड फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 झीर पर बी सुनी सकदे ओ।

<><><><><><>

## CS Meeting

मुख्य सचिव अटल डुल्लु होरें घरें-मकानें, ग्रामीण विकास, शिक्षा, समाज कल्याण, सेहत, राजस्व, कौशल विकास ते उद्योगें सरबन्धी खेत्तरें दिएं महत्वपूर्ण योजनाएं च हासल प्रगति दी समीक्षा लेई इक उच्ची सतह दी बैठक दी प्रधानता कीती। इस मौके पर जेहड़ी परियोजनाएं दा जायजा लैता गेआ उं'दे च अमृत योजना दा दुआ चरण, प्रधानमंत्री आवास योजना-शैहरी, स्वच्छ भारत मिशन, पीएम श्री स्कूल, आयुश्मान भारत डिजिटल मिशन ते एम.एस.एम.ई. वगैरा शामिल ना। मुख्य सचिव होरें कम्में गी बेल्ले सिर सबूरा करने, उं'दी नियमित निगरानी करने ते नतीजाकुन शासन बवस्था दी जरूरतें पर जोर पाया तांजे योजनाएं दा बढोबढ लाहू आम लोकें गी हासल होऐ। सरबन्धत अधिकारिं गी आखेआ गेआ ऐ जे ओहू योजनाएं दी अमल-आवरी दे कम्मै च तेजी आहनन ते जम्मू-कश्मीर दे चबक्खे विकास लेई तय लक्ष्यें गी असरदार ढंगै'नै हासल करन।

<><><><><><>

**Yatra Resume(Byte)**

रियासी जिले च पवित्र माता वैष्णो देवी दी तीर्थयात्रा अज्ज 22एं दिनें मगरा परतियै शुरू होई गेई ऐ। 26 अगस्त गी पस्सियां पौने करियै यात्रा गी रोकी दिता गया हा। श्री माता वैष्णो देवी श्राईन बोर्ड नै यात्रा गी परतियै ब्हाल करने दी तस्दीक कीती ऐ ते श्रद्धालुएं गी अधिकारिक सरिस्तें राएं ताजा जानकारी लैने दी अपील कीती ऐ। एदे कोला पैहले 14 गी यात्रा परतियै शुरू करने दी योजना ही, उआं तंदु बी बारी बरखा पेई गेई ही। यात्राएं दी सुरक्षा गी यकीनी बनाने लेई सुरक्षा दे सख्त इंतजाम कीते गेदे ना। श्रद्धालु “जय माता दे नारे” ला करदे न, कीजे मते चिरें मगरा यात्रा ब्हाल होई ऐ।

<><><><><><>

**GST Reforms (Byte)**

अगली पीढी दे जी.एस.टी सुधारें तैहत जी.एस.टी दिएं दरें च कटौती दे हालिया फैसले दा केन्द्र शासत प्रदेश जम्मू-कश्मीर दे लोकें बड़ा मता सुआगत करदे होई इ'नेंगी आम माहनुयै लेई बड़ी बड्डी राहत करार दित्ता ऐ। प्रधानमंत्री नरेन्द्र मोदी होरें आजादी आहले ध्याड़े पर इस बारै ऐलान कीता हा ते जी.एस.टी काउंसल नै जंदी 3 सितम्बर गी एकडे सुधारें गी मंजूरी देई दिती ही। जी.एस.टी काउंसल नै जुते-चप्पलें पर जी.एस.टी दी दर गी 12 फीसद शा घटाइयै 5 फीसद करी दित्ता ऐ। इसै चाल्ली लकड़ी, पत्थर ते धातु दियें मूर्तियें पर बी जी.एस.टी दी दर गी 12 फीसद शा घटाइयै 5 फीसद कीता गेआ ऐ। इसै चाल्ली दी कटौती कच्च दियें मूर्तियें, लोहे, एल्मूनियम, पित्तल ते तांबे दियें कलाकृतियें पर बी कीती गेई ऐ। आकाशवाणी समाचार कन्नै इस बारै गल्ल करदे होई इक मकामी बसनीक नै आखेआ .....(बाईट)

<><><><><><>